

Presidente Eric Henriquez ta relata:

SIWA a celebra su di 50 aniversario di existencia meymey di reto y logronan grandi

ORANJESTAD (AAN)— Sindicato SIWA (Sindicato di empleadonan di WEB Aruba NV), a celebra su di 50 aniversario di existencia, y den entrevista cu Matutino DIARIO, su presidente sr. Eric Henriquez, el a bay den pasado, presente y futuro di un sindicato cu logronan grandi, no obstante ups & downs y retonan cu ta keda presenta. Sr. Henriquez a expresa cu pa SIWA ta un honor di cumpli 50 aña di existencia, y a gradici tur esnan cu a ocupa e cargo presidente, vicepresidente, miembronan di directiva, miembronan, ex-miembronan., y esnan actual, cu a y ta dirigi SIWA ya pa cinco decada consecutivo.

El a recorda e prome presidente cu tabata sr. Vrolijk (den feliz memoria); un cargo cu sr. Henriquez ta ocupando aworaki. E lider sindi-

cal a conta cu nan a celebra e aniversario di oro aki en grandi, y a invita tur miembro y e mayoria a haci acto di presencia, incluyendo ex-vicepresidentenan cu awendia tin edadnan halto, pero cu ta muestra hopi fuerte ainda. El a gradici esaki. E sindicalismo aki a cuminza cu un lucha duro, cu retonan grandi (ups & downs) mas cu loke ta awendia. Henriquez a menciona cu SIWA a haya presidentenan cu diferente caracter, un mas fuerte cu otro, por ehemplo un Coby Geerman cu un caracter hopi fuerte y pa ken e tin hopi respet, y un Heyliger cu un caracter mas tranquil pero cu hopi strategia, pero tur a alcanza logronan grandi. Entre e logronan e ta corda aña 1977 cu Aruba a confronta un black out total unda cu e tempo ey sr. Vrolijk tabata presidente

di e sindicato, y a bay cu un delegacion hopi grandi na Hulanda, y despues a participa den delegacionnan na Corsow. Tambe e tempo di sr. De Cuba cu a bin un lucha fuerte ora nan kier a move WEB pa Lago, tempo cu e refineria a cera. Señor Henriquez a reitera palabranan di gratitud pa tur e pilarnan di SIWA y a subraya cu e bon C.A.O cu e trahadornan di WEB, cu ta un di e mihornan di e region, ta danki na e trabao duro di cada presidente di e sindicato, cu a pone nan pipita di santo, y e miembronan cu ta cargue, pasobra sin miembro practicamente un sindicato no tin derecho di existencia. Den e plenitud di e epoca aki, na aña 2019 bay dilanti, e retonan ta inmenso. Pa e empleadonan e avancen di e tecnologia ta touch cu nan directamente. E lider sindi-



cal a bisa cu e meta principal pa gerencia y tur hende cu ta traha den WEB ta pa e calidad di awa y coriente su calidad ta keda halto y cu fluho constante. Semper nan tin cu boga pa e prijs keda accesible, pa drecha e infraestructura, y pa tur cana manera mester ta pa e pueblo keda contento cu e prijs y calidad, locual e ta haya ta primordial. Actualmente tin un proyecto andando cu ta e cambio di e sistema bieu na un sistema

nobo y moderno di produccion y WEB mester wak con pa carga e tecnologia aki, con pa cambia e mentalidad di e trahadornan pa bay den e direccion aki. E presidente di SIWA Eric Henriquez a subraya cu ningun hende mester perde trabao y gerencia ta comprometi cu esaki. Sindicato y gerencia ta bon cu otro. Gerencia ta dunando su parti, pero ainda tin camindanan pa mehora, y nan ta traha pe.